

V.
DISSERTATIO MEDICO-CHYMICA INAUGURALIS,

QVA

SOLUTIO MARTISIN PURO ALCALI

ET

ANATOMIA SULPHURIS COMMUNIS,
SISTUNTUR,

Quam

Deo Duce & Auspice

IN ALMA REGIA FRIDERICIANA
GRATIOSO FACULTATIS MEDICÆ CONSENSU,
PRÆSIDE

DN. GEORGIO ERNESTO STAHL,
MED. D. EJUSD. ET RER. NATUR. PROFESS. PUBL. ORDINAR. ACAD. NAT. CUR. COLLEG. LONG. DIGN. FACULT. MEDIC. h. t. DECA NO SPECTATISSIMO,

DN. PATRONO, PRÆCEPTORE, AC PROMOTORE SUO,
omni Observantiæ atque Honoris cultu ætatem colendo,

PRO GRADU DOCTORALI,

Summisque in Utraque Medicina, Honoribus, Insignibus, & Privilegiis more Majorum legitime obtinendis,

D. Mart. A. M. D. CC XII. horis ante & pomeridianis

IN AUDITORIO MAJORI

Publico Eruditorum Examine subjicit

JOHANNES SPETH,

Nassov. Wisbad.

10

SOLITO MAR

TRINIDAD

ANATOMIA

RIS COMMUNIS

STUTTGART

Dr. D. S. S. S.

Dr. D. S. S. S.

DR. GEORGIO EUGENIO STALL

Dr. D. S. S. S.

Dr. D. S. S. S.

Dr. D. S. S. S.

Dr. D. S. S. S.

PROF. DR. D. S. S. S.

Dr. D. S. S. S.

Dr. D. S. S. S.

Dr. D. S. S. S.

Dr. D. S. S. S.

Dr. D. S. S. S.



PROOEMIUM.



Inter plurimas res, quæ in civili vita, imo Politiâ arctius considerata, seu ad Systema Civitatis firmandum atque fulciendum, quam maximè vigilanter observari, & prudenter terminis suis circumscribi, mererentur, non ultimo certè loco numerari deberet. Jus

circa prodigalitatem; seu libertatem, facultates suas pecuniarias, imò honorem, quin potius honestatem, atque fidem, temerè dilapidandi, & planè pessundandi. Ubi, licet jura Scripta, prodigos sui juris esse debere, negent, sed sub curatore habendos esse, asseverent; ad eò tamen rara horum generum invenire licet exempla, ut, si quæ in hanc rem promulgatæ unquam fuerunt leges, jam pridem antiquatas illas esse, res ipsa confirmet. Quid, quod recentior sapientia politica, etiam hic peculiare mysterium, & reconditum axioma, collocare videatur, ut potius quoque modo, qui paulò plus possident bonorum, etiam suppeditatis callidè occasionibus, seducantur potius, quam inducantur, ad

profundendas suas divitias, ut abundantia paucorum inter multos distribuatur, & hac ratione, quod in ore gerunt, Circulatio Sanguinis Civilis conservetur, *daß das Geld im Cours bleibe* &c. Profectò verò, si non intrà ultimum hoc, quod per quinquaginta fortè annos luxit, ævum, exemplar hujus rei in sensus ingestum est, vix quamdiu Mundus stetit, ullum invenire licuerit æque luculentum. Ubi antiqua fabula, fimiis visco palpebras ogglutinandi, indumentis sinuosis, & liberum gressum implicantibus, ocreisque pedum cursum eripientibus, illas capiendi, nova data est: Dum Gens pauper, & in fœcunditate sua, etiam alimentorum inopia laboratura, commerciis futilium, & planè nauci, rerum quæ post fragilem & evanidum fucum, nihil nisi lacinias, & quisquillas relinquunt, à Germanis aurum & argentum solidum, quod his domi nascebatur, tanta copia aucupari scivit, ut hi quidem patriis suis bonis exuti, illa vero iisdem potita, ditata, & in eam superbi- am & contemptum horum erecta sit, ut etiam Ser- vitutis jugum, pro ultima merce, promere nihil dubi- taverit. Neque hoc propemodum injuria, ubi etiam detestandas illas merces, luxum, fastum, otium, secu- ritatem, non impudentius venum exposuerat, quam imprudentissimè, & carissimo quolibet pretio, emi, ex- perta est. Sed quo dilabimur! manebimus intra li- mites nostri circuli, ex illo solum istud intuentes, quod artis Chymicæ prætextus, tantis, & tam variis, abusi- bus, civilem felicitatem passim implicuerit, ut inde in- gens prodigalitatis, & passim non resarciendi damni, scandalum, totas familias ad incitas rede- gisse, numero- sis exemplis sentiatur. Equidem severis, jure merito- que,

que, poënis coërcetur monetarum falsa imitatio; sed & artem aliam incertam, Chrysopœiam vanam, capessere, imo aliis non suadere magis, quam inculcare, qua & facultates temerè prodigantur, & alii contagio hujus furoris audacter inficiantur, an non majus falsum in civilia negotia introducat, quod latius se diffundat, & mercimoniorum publicam fidem gravissimis detrimentis passim affligat, prudente contemplatione neutiquam indignum judicamus. Quamvis autem ad eos hanc censuram quam maximè pertinere, lubentes agnoscamus, qui pro civitatum commodis & salute vigilare debent: Non potest tamen etiam negari, quod nequaquam penitus negligere partes suas deceret illos, qui sanæ artis Chymicæ, non scientiam solùm, & peritiam, sed doctrinam planè, præ se ferunt, aut in se recipiunt, vel sibi sumunt. Hic enim, si usquam, esset locus atque tempus, vera à falsis, vanam speciem à certis atque ratis potestatem artis à nugis atque fabulis, distinguendi. Ne verò quidquam per tumultum, & turbato ordine, agitetur, esset sine dubio regia omninò, & planissima via, per simplicia potius Experimenta, scientiæ dignitatem atque firmitatem illustrare; quam nudis nihil intellectis artificijs, & ut meritò appello, artis vitiis, alibi fucum facere, alibi aliunde pati atque experiri. Unde rectissime quidem hæc negotia respexisse videntur illi, qui simpliciorum experimentorum, eorumque contemplationum, studium, commendaverunt præferendum, intempestivis speculationibus, & irritis opinionibus, ex uno aut altero malè intellecto phænomeno, temerè formatis. Sed videant hæc curiosius, quos hæc agere propius decet; Nos certè, quantum hoc studio, tam ad scienti-

am, quam ingeniosam artem, oblectari solemus, insitemus huic semitæ, & potius ad locupletandam scientiam quam irritandam concupiscentiam, respicientes, Phycis inprimis considerationibus & revocandis in viam Medicis abusibus atque superstitionibus, experimentorum chymicorum sobriæ tractationi, & considerationi operam navabimus. Ex hac partim depromimus, partim iterum in memoriam revocamus, bigam experimentorum chymicorum, quam SPECIMINIS etiam INAUGURALIS loco sistere, tanto minus dubitamus, cum tam ad justam æstimationem, quam prudentem applicationem Therapeuticam, aliquid lucis afferre posse, pro certo habeamus. Erunt autem hæc I. SOLUTIO FERRI atque Chalybis IN ALCALI FIXO: II. Simplex, & tamen solida, ANATOMIA SULPHURIS communis seu mineralis.

Velit Deus T. O. M., ut hic noster labor assequatur scopum, ad quem collineamus, nempe artis utilitatem, ut scientiæ veritatem.

§. I.



HYMIA, ut *Ars*, *habitus* esse debet cum *recta ratione effectivus*. Ratio hæc *recta*, pro objecto habere debet, *verum* habitum rerum, quem ita possident, ut sensibus nostris deprehendi, & ultima perceptione, quæ necessario *discretiva*, adeoque *judicativa* seu *intellectualis* est, comprehendendi possit: Tum etiam *mutuam* illam habitudinem, quam *reciproce*, inter se invicem, gerunt. E quarum nempe rerum judiciofa combinatione, *positive*, aut *privative*, eo *tempore*, quo ipsa *Ars*, certum aliquem effectum, pro suo iubitu, perpetrare vult, eodem potiri, se-

cun-

eundem illam sanam *rationem*, valeat; imò, ut omnem artificiosam *praxin*, *theoria* aliqua præcedit; ita nascitur hinc etiam *Chymica theoria*, nempe *intellectus*, quomodo à rebus, ita ad se *invicem* se habentibus, effectus tales proveniant, quos Ars ipsa, nec eo tempore intendit, nec ad eosdem concurrit: imò aliquando nec assequi eosdem *imitando* valet, aliquando tamen ad minimum præcipua ex parte, hoc ipsum etiam impetrat.

§. II. Quamvis autem negari non possit, quod numerosissimæ *combinationes* mixtionum atque Combinationum, quæ in regno naturæ Geocosmico fiunt, nequaquam spondeant talem aditum arti, quantumcunque etiam curiosæ, ut intima ejus penetralia perlustrandi libertate potiatur; non est tamen ita præc'usus omnis accessus, quin non ita minima pars harum rerum, ita satis exquisitè lustrari possit, & vel planè arbitrariâ arte, imitari liceat varia ipsius naturæ producta. Dummodo filum Ariadnæum *rectæ rationis*, & fax solertissimæ *circumspectionis* & *inspectionis*, maxima cum cura sedulò applicetur: Quo Duce, & luce, in intimiora & recondita naturæ adyta pertingendi, non plane temeraria spes blanditur.

§. III. Potest autem Ars, præter hæc, quæ ipsa quoque natura perficit, etiam talia invenire, & suis viribus quasi machinari, quæ ne quidem in naturæ potestate, aut certe non in usu illi sint: ut nempe simili, nedum pari ratione, ut ab arte præstari possunt, etiam *sponte* naturæ fieri observentur. Exemplorum talium est affatim, è quibus notissima sunt, *spiritus ardentes*; nempe pariter, *extra nexum* cum reliquo fermentato, inveniendi, sal alcali fixum: Acidum *nitri*, *seorsim*, ut & *salis communis*, & quicquid eum his deinde ratione materialium, & modorum, magno numero, jungitur, & producta merè *artificialia* sistit &c.

§. IV. Interim maximo cavendum est opere, ne profanis oculis locupletissimum illud Gazophylacium Naturæ, (quam quisquis fuit, qui *artem divinam* in materia, defini-

vit,

vit, recte sensisse videtur,) fugitivo aut inverecundo obtutu, & quod ajunt per transfennam speculati, mox cum fastu nobis videamur, & aliis videri gestiamus, totum fastissimum hoc latifundium, velut ad unguem excussisse, & profundissimum hoc mare, modiolò intellectus, etiam imprudenter adhibiti, exhausisse. Cum potius justissima certè, & planè debita in hoc genere, sit verecunda reverentia & præcipuum magisterium, in studio atque solertia, semper plus ultra discendi. Unde certè cum grano salis accipienda est illa promiscua promptitudo, chymiam, tanquam omnibus numeris jam *absolutam*, in *artis* forma tractandi: nisi quod ambiguitas illa hic locum sibi vindicare videatur, dum chymix nomine, *coquinam* illam, huc usque inter vulgus *Seplafiariorum* usitatam, & artis formam, consarcinationem ad umbram alicujus systematis, intelligenda supponit. Unde etiam est quod in illis ita usitatis systematibus vix vola aut vestigium artis (id est *rectæ rationis* res ipsas assequentis, & *efficaciæ*, firmæ experientiæ compotis eique paris,) compareat circa *Mineralogiam* atque *Metallurgiam*; quin ipsam adeo veram & realem, & experientiæ compotem tam *theoriam* quam *Praxin* Zymotechnicam.

§.V. Ubi ne nobis, quod admodum vulgatum est, malignè tribuatur, quasi solum alios carpendi, imò detrahendi, licentiæ indulgeamus, allegabimus solum aliquot hujus rei specimina. A quot jam Seculis usitata, & lynceo huic propiori ævo, in medio propatulo, & omnibus sensibus exposita fuit, Praxis *fusoria* metallorum imperfectorum. Quis autem Doctor chymicus, *rationem*, non dicam evolvit, & clare luci exposuit, sed solum contemplatione dignam judicavit, & hanc pervestigandam commendavit, quam ob rem mineræ talium metallorum, pro sulphure & arsenicalibus superfluitatibus, & heterogeneitatibus auferendis, sufficienter *ustula*, mit gnugsamen Kost-Feuer Zue-und ausgebrand/ fundendæ tandem veniant, per usitatos officinales furnos, nempe

pe non igne, & quantolibet ejus gradu simpliciter: sed ita inter medios carbones, ut corporaliter hos contingere, & inter illos diffuere, defluere, imò quasi cum ipsis confluere, possint? Quis *rationem* commonstrabit, quam ob rem *mollioribus* hujusmodi *plumbo*, *stanno*, etiam minores carbones, in infimo furno infra follium flatum, præsternendi veniant, ut, quod Vulgus Fusorum loquitur, fusum metallum, inter, seu potius infra illos, confluere seque *receptare* atque *conservare* possit, daß sich das Metall unter das Gesüßbe sencken / und verkriechen / und darunter / oder dadurch / frischen könne?

§. VI. Quotusquisque verò talium dogmaticorum artis descriptorum, scit tantum, nedum intellexit, quod & quare, *ustulatæ* ita mineræ, in vase aliquo, *contactum* carbonum intercludente, nunquam ullo tempore, in *metallum*, sed unice in *vitrum* redigi possint. Ubi profecto tota *frigida* est vulgò prætensa illa ratio, quod *æstus* igneus, è carbonibus immediate erumpens, plurimum antecellat illum gradum, qui per transversum vasis alicujus terrei, ad mineram talem in eo, contendat penetrare valeat: Und man ihm deshalb nicht nach Nothdurfft warm gnug thun könne.

§. VII. Cum frigida hujus rationis *ratio*, ab operariis hujus rei peritis, non tam *argumento* ab absurdo, quam *documento*, propemodum joculari, in hoc ordine, evertatur: quando cinerem *stanni* recens productum, qui nullo ignis gradu, *per se*, in stannum reduci potest, in cochleari illo ferreo *stannifabrorum*, ne quidem candente, per *frustulum sebi* è candelabro decerpti, in pristinam *stanni* consistentiam, tanquam in momento redire, monstrant.

§. VIII. Quis autem hanc *rationem*, è concinnâ, & valde pura, operatiuncula illâ docimasticâ eruere potuit, qua mineræ *ustulatæ*, & quidem penitissime exustæ, recht rein ausgeröstet und ausgebrandt (quod imprimis in docimasticis *cupri*, qua talibus, absolutæ necessitatis esse, periti satis

sciunt,) in metallicam consistentiam reduci postulant; per sic appellatum *fluxum nigrum*, è *nitro* & *tartaro*, ita tamen, ut *plus tartari* quam *nitri*, assumtum sit?

§. IX. Imo quotusquisque horum speculatorum, si quidem scit operationem aut vidit, elicere valuit hanc eandem *rationem*, è *furno reductorio* officinarum fusoriarum, aus dem *Stich-Ofen* / durch welchen *Glätte* / *Heerd* / *Tess* / *Ofenbrüche* / wieder zu *Bley* geschmolzen werden?

§. X. Quæ tota res, ne nudæ otiosæ speculationi, aut ad summum *nudæ Physicæ* scientiæ, non autem arti *Chymicæ*, deberi videatur, satis notum est peritis, quanta hinc damna, ver. proventui metalli obtingant, daß sich das *Erz* nicht rein im *Schmelz-Ofen* scheidet / sondern entweder in denen *Schlacken* bleibt / oder gar zu *Sauen* schweisset / die hernach weder zu *sieden* noch zu *braten* taugen wollen. Certe in viciniâ, à paucis tempore inclaruerunt hujus rei documenta luculentissima; ubi montes *scoriarum* talium, à duobus, & amplius, seculis, in acervos cumularum, die alten *Schlacken* hallen / tanquam novæ *fodinæ* metallicæ denuo coli incipiunt: & quidem ea, etiam oculari, dignotione, daß es die *Berg-Jungen* auszuflauben lernen: quæ *vitrea scorie*, denuò debite fusæ, non contemnendam quantitatem illius metalli, denuò largiuntur.

§. XI. Ubi profectò iterum male sibi consulunt speculatores, quando *Paracelsistarum* somniis, & vulgi operariorum transumto consensui, auctoritatem adjicere conantur, fabula illa, die *Natur* / die *Zeit* / das *Gewitter* / die *Nostrauche* / das *Gestirn* / habe wieder neues *Metall* hinein gewürckt: quod inscitia theoreticorum, & imperitia, ignavia, negligentia, & properatio fusorum operariorum, jampridem, hæc in illis reliquit, & illa ex illis educi posse & debere, & qua *ratione* hoc fiat, nescivit. Cujusmodi etiam insigne exemplum annotatum habetur in chronico minerali *Albini*, ubi fusores, cum inundatione *Mulde* fluvii, à *minera* recentis advectione diu inter-

interclusi, miserum otium trahere coacti, (dum labore destituti, etiam mercede carerent, & consequenter pane,) cum quidam eorum, in sollicitudine suâ, inter cumulos antiquarum scoriarum spatiaretur, bona fortuna miculas & ramenta *argenti*, in vitrea harum densitate conspicatus, animum adjecerunt, ad refundendam aliquam horum quantitatem: da er hie und da Silber-Flätschen / an und in denen glasigten Schlacken erschen / an statt des Müßiggehens / eine Schicht davon durchzusehen vorgenommen: ubi historia memorat, haud multo minus boni metalli inde eliquatum fuisse, quam usitata priore fusione provenisse, diaria docerent. Interim mala fortuna tulerat, ut, propter angustiam locorum, consulto, & propter impetum fluminis etiam ex accidenti, per inundationes temporarias, pleraque pars talium scoriarum, non magis sepulta in alveo, quam direpta à fluento, à multis retrò annis periisset.

§. XII. Ita etiam paris momenti certè est, usitata theoria, *imbibitionis* seu *receptus*, *argenti*, ex aliis metallis, adhuc quantumcunque *sulphuratis*, in plumbum. Cui rei inprimis innititur, totum negotium secretionis *pauci argenti* è multo cupro, das ganze Rupffer-Sengern. Ubi altum sapiunt, & gloriosè philosophantur, qui *frigiditatem Mercurii saturni*, cum frigidâ indole *Lunæ*, symbolismos atque magnetismos spirantem, in scenam plane Tragicam producant. Cum nimio simpliciore fundamento, sed tamen subtiles speculationes, sine facili experientia, perpetuò destituturo, totum negotium insistant.

§. XIII. Par ratio autem, at ex eodem fundamento surgens, est, *precipitationum* fusoriarum, imo etiam *ustoriarum*, per additamenta, quæ *sulphureo arsenicales* heterogeneitates imbibere debeant: der Zue-und Nider-schläge / welche denen Erzen im schmelzen / oder auch noch im Rösten / zuegesetzt werden / um die Wildigkeit / und räuberische Schwefel / zu gewältigen. In quibus nempe casibus, quanta sit differ-

rentia, & qualis, inter diversa schemata talium materiarum, quis docuerit, imò solum perceperit, non injusta est quaestio. Ita enim v. g. *minera ferri* ab aliquibus commendatur pro tali scopo; adhibenda *fusioni* minerarum talium, *rapacibus* hujusmodi heterogeneousitatibus infectarum. Quæ, licet aliquid hic possit, ad illam portionem, quæ ignem transcurrit, & ad fundum furni confluit; nihil tamen præstat ad illud, quod sub *actu* fusionis, & hujus *defluxionis*, & *præterlapsus* per flatum folium, in *volatilem* halitum dispulsum, interim sursum per furnum evaporat, & boni metalli portionem secum aufert. Cum *minera ferri* nihil hic possit, sed *ferrum* jam eliquatum solum: Hoc autem propter difficultatem fusionis, nimis certè tarde assequatur portionem mineræ talis ita diffluentis, des rohen mit räuberischen Schwefel inficirten Steins. Interim etiam in *ustorio* igne, propemodum absolutè nullius usus sunt talia additamenta; nempe *Mineræ ferri*, *crocorum* martialium &c. Cum nihil horum à *rapacibus* illis materiis corripì possit, ut ita melius metallum derelinquat: Sed *ferrum* perfectum, in *limatura*, *filo*, aut teneris *lamellis*, adhibendum veniat. Alia autem utique ratio est *calcis*, sive *vivæ*, sive spontanea *extinctione* in aëre humidulo, in pulverem collapsæ; sed solum ad *ustiones*, cum *fusionem* difficiliorem reddat. Operæ autem pretium facientes mineræ, etiam bono *limo* conculcatæ, & sufficiente calore ustulatæ, potissimam partem rapacitatis illius exuunt.

§. XIV. Interim definire, quid in his casibus *singulis*, vero usui quam maximè quadret, impossibile utique est, quamdiu fundamentum illud non liquidò perspectum est, quæ talium materiarum, sub quo *schemate*, vel *ustioni*, vel *fusioni* magis conducant, ut sub alterutrâ, *rapaces* illas heterogeneousitates combibendo, purius metallum ita liberent.

§. XV. Hoc autem quod nunc nominabimus, equidem à nemine exigimus, ut sciat, aut sciverit; cum satis pro
com-

comperto habeamus, neminem illud, ita *passim*, scire, nisi cui D. D. Præses, aut unus quidam è priscis ejus discipulis, illud monstravit. Nempe, si *Regulus antimonialis*, *argento*, *plumbo*, *bismutho*, imo *cupro* remixtus fuerit; aut, pro experimento, cum aliquo horum metallorum colliquetur, *regulum* hunc ita ad *superficiem* horum metallorum (sine prævia *calcinatione*, aut alia *vitrescente* facie, aut ullo *sale*, insuper remedio quam minimi pretii) extrahendi, ut in *regulino-metallica* facie supernatet, & reliquum metallum tanquam reguli alicujus loco illi substat, & mallei ictu hinc separari possit. Insuper etiam hic idem ita separatus regulus, non corruptus inde sit, aut deperditus; sed quadrante horæ in plenam sui puritatem colliquari & reduci possit. Et hoc innumeris vicibus, cum illo eodem repeti valeat.

§. XVI. Quamvis autem sine dubio satis paradoxum hoc videri possit, *regulum antimoniale*, qui ab omnibus aliis metallis, præter unum mercurium, alias *deorsum* secedit, separatione usitatâ; inverso ordine, ad superficiem horum educere, ut illis innatet, *regulino-metalliciformi*, inquam, consistentia: habet tamen res paradigma quoddam, in *majoribus* fusoriis officinarum laboribus, in minus exquisite notâ illâ substantia, quam fusores *Speise* appellant. Quæ nempe pariter, à *vitrescente* quidem scoria seorsim subsidet, sed tamen *super* metallum reliquum, etiam seorsim, residet, in certis mineris, *antimonio-arsenicalibus* heterogeneitatibus imbutis.

§. XVII. Ita certe etiam, licet simplex sit operatio, tamen apud prolixos chymicarum rerum commendatores, quantum nos sciamus, frustra certe quæretur, quomodo *stannum*, *unica fusione* cum decente additamento, reducatur in talem *nigro-fuscam* materiam, quæ innox in aqua calida dissoluta, plus media sui parte per *filtrum* transeat. Cuius D. D. Præs. in Specimine *Beccheriano* mentionem fecit.

§. XVIII. Ita certe etiam in *rectâ ratione*, & huic su-

perstructa artificiosa efficacia, & insuper valde simpliciter, fundata est operatio illa, *argentum, cuprum, ferrum*, in quantalibet quantitate, promptissima enchirisi ita disponens, ut facillime in tenuem *pulverem contundi & conteri* possint, adeoque promptis tenuibus solutioribus adhiberi. Quibus peractis, additamentum, quod hæc ita disposuit, statim demuò, & hoc multoties iterum iterumque, eidem usui inservire possit.

§. XIX. Ubi, licet in *cupro & ferro*, hoc etiam per alterum quoddam additamentum, similiter obtineri possit; intuitu *fortiorum* inprimis solventium: non procedit tamen pariter cum *argento*, quin *solubilitatem* ejus impediat. Tanto magis autem impedit hoc, quod hoc §. designamus, additamentum, omne *argenti & cupri* commercium cum *argento vivo*; cum illud, quod §. præcedente intelligimus, hoc minime impediat, sed potius *amalgamationi* tenerrimæ aptum relinquat. Puto autem, qui cogitandi compos est, haud difficulter affecuturum, de qua materia loquar: propter quam ipsam facilitatem, non operæ pretium duco, illam nominare: satis interim certus, aut ad minimum ingenue confitens, non meminisse me, à quo Dogmatico rationum chymicarum promocondo, res hæc usui commendata sit.

§. XX. Non placet plura horum generum exempla recensere, quæ vel neglectu prætermissa, vel non intellecta, interim egregiis usibus idonea, imò partim in usu versantia, sed perperam explicata, allegari possent; sufficiet unum adhuc è nostro penu depromere, certè ad minimum in ordine *scientiæ*, nequaquam ab ullo prudente atque perito chymico contemnendum. Est hoc illud, de quo schediasmate peculiari egit D. D. Præses, & merito in specimine Beccheriano verum ejus habitum ad theoriam commendavit. Quis unquam hodiernorum chymicorum, non dicam *tradidit*, imò nequidem *scivit*, aut *testatus* est, & *consensit*, sed

cre-

credidit solum, & non potius publicis positionibus, quando de hac materia sermo incidit, *negavit*, quod *sulphuri communi*, ullum jus aut potestas competat in purum *aurum*. Dum interim demonstratum est, quod *sulphur* hoc, *aurum*, non solum ut reliqua omnia metalla, in *calcem* redigat; sed planè ita *tenuissimè* sibi associet, ut etiam illud per *filtrum* secum corripit. Quæ res, ut in se ipsa, juxta vulgaris Chymicæ placita, certè inopinatum quiddam sistit: ita completitur omnino sub se adhuc theoremata aliqua, ad praxin ipsam pertinentia; quomodo etiam in *mineris*, à *sulphure* correptum, & quasi *corruptum*, aurum, varios separationum modos deinde subterfugiat ac eludat: quod certe nemo intelligere potest, nisi hujus experimenti, in se simplicis, ulteriores recessus peruestigaverit. Ut de *auri*, exustione, per *ferrum*, ad longe difficillimum reductionem, & per *Mercurium currentem*, ad planè parem effectum, ut in *vitrum* omninò fatiscat, hic nihil dicamus &c.

§. XXI. Afferemus potius aliud experimentum, quod nos quidem sciamus, à nullo Chymico traditum, imo potius à nullo creditum; nempe *Ferri*, in tota sua *substantia*, *solutionem promptissimam*, in *Sale alcalico fixo*. Cum enim ferrum, in omnis generis *acidis* liquoribus, promptè solvatur, & contrà, per *alcalia* iterum ex hujusmodi solutionibus præcipitetur: mirum esse non potuit, si per absonum illud axioma, de *alcali & acidi contrarietate*, fidem superaret, quod etiam ab *alcali*, tanquam *contrario* acidorum, concretum hoc, non minore promptitudine, & totum quidem, non per *separationem* tantum aliquam partium sui, dissolvatur.

§. XXII. Notum quidem est experimentum, quo vulgo ita dictus *crocus martis cachecticus Quercetani* acquiritur; nempe limaturæ ferri recentis, cum p. æq. nitri detonatione. ubi utique *nitroscæ* substantiæ, *qua talis*, dissolutio per deflagrationem, post se relinquit *alcali*, (quod in præpara-

paratione nitri, è cineribus, & *calce viva*, additum illi atque sociatum fuerat. Unde quando, operatione hac dextrè peracta, crama illud in aqua solvitur, tingitur hæc colore *purpureo-violaceo* saturato: quæ citò filtrata, *alcalicum* salinum est liquamen, portionem aliquam è *marie* correptam atque solutam, continens. Interim vix horæ quadrantis spatio, *secedit* iterum ab hac solutione, & malæ quasi fidei societate, portio illa *martialis*, in *ferina pulveris*, certè tenuis, *lateritii* coloris, & ad fundum subsidet, *alcalico* illo lixivio limpido iterum relicto.

§. XXIII. In nostro vero experimento, planè dispar est facies totius processus. Siquidem hic *mars*, in *acido* potente solutus, solutioni *alcali* fixi instillatus, illum effectum subit & sortitur, ut quidem *acidum* illud, sub usitata talibus commixtionibus *effervescentia*, cum portione salis *alcali*, (quod proinde in *largâ* quantitate adhibendum est,) coalescat, & detentum huc usque *martem*, dimittat: hunc autem arripit *statim momentaneo* successu, purum reliquum *alcali*, & subtilissimè, sanguineo-flavescentis coloris *schemate*, corripit, & *solutum* firmiter detinet. Unde, quando ad satietatem *marie* ita imbutum est *alcali*, saturatissimum sanguineo-rubicundum *colorem* refert.

§. XXIV. Illud quod insolentiam huius processus atque successus augeat, & verisimiliter tam simplicis operationis, eventum, vulgo Chymicorum hucusque incognitum retinuit, *duabus* causis inniti videtur; uni *moralì*, alteri *physicæ*. Prior est, quod chymia usitati moris, pharmaceuticis coctionibus plurimum destinata, quicquid non in quotidianæ formulæ scriptis processibus per manus traditur, exercere & pervestigare dedignetur, atque negligat. Altera, *physica*, est, quod trivialibus illis negligentibus Solventium assumptionibus, assatim processui satisfecisse credentes tales operadores, si saltem *alcali* adhibuerint, nempe *contrarietate* illa *alcali* & *acidi* hic freti: sub qua tamen consi-

sten-

stentia *debilius* alcali, *solutioni* huic impar evadit, & nudam *præcipitationem* martis, absumto acido quod illum hucusque solutum detinuerat, permittit: adeoque antiquam illam cantilenam, de acidi & alcali *contrario* effectû, sustentat.

§. XXV. Experimentum ipsum autem est hoc. Sit ad manus ita dictum *oleum tartari p. d.*, aut *cinerum clavellatorum* solutio *p. d.* aut, solvantur cineres clavellati in aqua calida, ea quantitate affusa, aut vix mediam partem alcali hujus solvere valeat: quod clarum est fitretur. Breviter, sit solutio alcalica saturata. Jam solvatur *ferri* aut *chalybis*, parum una vice, in bona *aqua forti*; cui per vices iterum imponatur pauxillum, donec placida hujusmodi solutione, tandem saturatum sit solvens & ultimam portionem (v. g. fili chalybei) intactam relinquat. De hac solutione instillentur aliquot guttæ, liquori illi alcali fixi; cadent hæ ad fundum, sed mox spumescendo, nempe congressu acidi cum alcali, ad superficiem emergent: ubi agitatione in latifundium liquoris alcalici repulsæ, statim efficient, ut illæ, ab acido per aliquas particulas alcalicas, depulsæ particulæ martis, à reliquo *alcalico* sale solvantur. Quæ itaque instillatio & coagitatio, tam diu continuari potest, donec alcali illud tanta quantitate martis *saturatum* sit, ut inde saturatissimum sanguineum colorem contraxerit.

§. XXVI. Liquor hic continebit ita duplicem substantiam. Nempè, primò, *nitrum*, ex aqua forti, & alcali sufficiente portione, *regeneratum*. Secundò, *alcali* residuum, quod desertum ab aqua forti *martem*, nunc à se *solutum* continet. Unde si etiam aqua fortis benè saturata adhibita fuit; aut de solutione martis, per quamcunque aquam fortem factâ, aliquid lenissima *exhalatione* auferatur, & in primis imbibitio illa in *alcalicum* liquorem, frigido tempore peracta sit, aut in frigidum locum reponatur, coalescit mox bona portio nitri in *crystallos*, sed propter saturatum reliquum liquamen, *tene-ros*: qui tamen deinde in nuda aqua soluti, & in illa *crystalli-*
C
fati,

fati, alius nitri more, spiffiores coalescunt. Cæterum separata ab his reliqua illa *alkalica* solutio martialis, sincerior ita erit.

§. XXVII. Imperitum autem esse oporteret etiam trivialis chymix, qui in hac solutione adhuc aliquid effectus *acidi quatalis*, subesse suspicaretur. Quamvis enim contrarium, statim à *posteriori* comprobatura sint, ulteriora phænomena, mox recensenda; tamen etiam à *priori* facile dilucescit contrarium, dum nemo futurus est, quin intelligat, quod *acidum nitri*, non solum *saturetur*, & firmiter *coalescat*, cum proportionata quantitate *alkali*: sed etiam propterea omninò ipsius *alkalici* liquoris, tanta utique *quantitas* assumenda veniat, quæ non solum saturando acido aquæfortis, abundè sufficiat; sed etiam quæ adhuc *solvendo* illi marti sufficiat, qui ita ab acido illo, à portione *alkali*, *detrusus* est.

§. XXVIII. Unde pro experimento hoc rectè secundum artem instituendo, è re fuerit hac ratione procedere. Primò, fit ad manus quantalibet quantitas saturati liquoris *alkalici*. Illius v. g. Uncia una, saturetur aquæfortis (etiam notato pondere) tanta quantitate, donec à nova gutta una aut altera, nullum vestigium *effervescentiæ* amplius observetur. Hæc proportio notetur; quantum, inquam, hujus *alkalici* liquoris, exquisitè sufficiat saturando illi acido, quod in hac aquæfortis certâ quantitate præsto est. Jam si nostrum experimentum cum his liquoribus instituendum sit, capiatur *triplex* quantitas *alkalici* liquoris, ad *simplicem* aquæfortis, in qua mars dissolutus fuerit: Ita una harum portionum saturabit *acidum* illud; reliquæ *duæ* vero, *solvendo* marti, qui ab illo secedit, inservient.

§. XXIX. Illud enim omninò sciendum est, & declarabit sola praxis attenta exactiorem proportionem, quod utique *alkali*, *minorem* quantitatem martis solvat, quam *aquæfortis*.

§. XXX. Inde, cum esse possent qui paulo solertiore intellectu Chymix monerent, in plerisque *præcipitationibus*, aliquid,

aliquid utique, probabiliter etiam de *acido*, cum *præcipitato* tali, tenaciter connexum manere. Unde alteratio illa *Calcium* ex acidis *præcipitatarum*, ut nequaquam *simplicem* suam indolem posthac referant, & ordinariè, sæpè numero etiam eximiè, majus *pondus* à præcipitatione reportent. Quod tamen hæc res, & inprimis ut proprie ab *aciditate* aliquâ deducenda, negotium præsens non exhauriat, demonstrat statim alterum experimentum. Si enim solutio ejusmodi per *aquam fortem*, cum *alkali* eo usque saturetur, ut *maris* actu inde ad fundum secedat; hæc utique *calx* semel ita præcipitata, quantæcunque portioni *alkalici* liquoris posthac imposita, non solvitur ab illo, quod tamen secundum hanc opinionem omninò evenire deberet.

§. XXXI. Tanto magis autem demonstrat aliud experimentum, quod hæc nostra solutio *martis*, omninò præstetur ab *alkali*, *quatenus tali*. Cum enim, quæ ab *alkalibus* soluta sunt, ab *acidis* iterum præcipitentur; evenit hoc etiam in nostra solutione, à quorumlibet acidorum affusione, & etiam *debilissimorum*. Quod documento sufficienti esse potest, quod *nitrosi* acidi, *quæ* acidi, nulla sit energia in pristina illa *alkalica*, solutione; cum hoc ut potentius, alii debiliori minimè cessurum esset. Ita enim præcipitabitur solutio hæc per *alkali* facta, non solum per *acetum*, & *tartarum*; sed etiam per *vinum*, imò per *urinam*. Quibus duobus postremis, longè tenerrima, prioribus autem paulò densior, cadit *calx martialis*.

§. XXXII. Et in his inprimis consistit *experimentum* nostrum ipsum, ejusque administratio; quin etiam vera generalis *ratio*, quod nempe solutio hæc revera *alkalica* sit, & ferrum in ea ab *alkali* solutum: & quidem in *tota sua substantia*, nulla forte *separatione*, aut *electione* certarum præ aliis, partium: sicuti simul, non postremam utique considerationem ad se vocat, *promptissimus* atque præsentissimus successus hujus solutionis; dum utique veluti per nuda *momentum*

ta, simulatque ab *acido* hoc *decidit* mars, ab *alcali* combibitur atque *solvitur*. Univerſim autem ita omnino, magnum illud *Paradoxon* ſtabilitur, nempe nuda atque *pura ſolutio martis in ſale alcalico fixo*.

§. XXXIII. *Theoriam* hujus rei quod concernit, edifferemus circa illam, quid nobis videatur. Fundamentales autem ſuppoſitiones ad hanc facientes, ſunt præcipue ſequentes. *Primò*, notandum utique eſt, quod hæc *ſolutio*, ne dicam eâdem promptitudine & quantitate, ſed potius quantum nobis adhuc innotuerit, *ſimpliciter non*, ſuccedat cum ſolutione martis, per *aliud* quàm *nitroſum*, acidum facta, (quicquid etiam *B. Ludovici*, nec imperitè, brevi notâ moneat de *magiſteriis*, quæ *acida* aſpernentur, ſed *alcalibus* quadantenus obſequantur) *Secundò*, quod *alcalia fixa*, non coëant, per modum *ſolutionis*, cum concretis, (in primis ita promptè atque facile, ſcimus enim exceptionem, ſed quis ſcit an omnes ſciant?) niſi vel *aciditatem* vel *inflammabilitatem*, præ ſe ferant.

§. XXXIV. Jam, licet *mars* utique etiam in communi ſua ſubſtantia, tantò magis autem *chalybs*, *phlogiſto* illo principio non pauper exiſtit; quod partim per ſimplicem ejus *exuſtionem* in *battituram* (tanquam *carbonem*) & *crocum* (tanquam *cinerem*) manifeſtum eſt: partim per *inflammationem* ejus cum *nitro*, diluceſcit: non ſatisfacere tamen hanc *phlogiſti* quantitatem, penetrationi ſalis *alcali*, res ipſa loquitur, à poſteriori: partim aliud experimentum, a libi à D. D. Præſide allegatum (menſe *Januario*,) innuit, monſtrans nempe, quam pauca quantitas v. g. de una libra martis, velut abundanter inſtructa hoc principio, *tenerriſimum* etiam *crocum* præbeat. Quorſum eodem etiam ſupra jam citatum experimentum *crocī martis cachectici Quercetani*, conſpirat.

§. XXXV. Cum autem in noſtro experimento, *aciditatis quæ ſimpliciter* talis, concurſus & peculiaris vis ad hunc

hunc effectum, reverà nullus compareat; adeoque totum rei gerendæ auspiciū, recidat in *phlogiston* illam indolem, salī *alcalico* amicam atque obsequentem: hæc ipsa vero substantia etiam in ipsius *nitri* mixtione, non ultimam, seu minimam (NB. *numero & mensura*, nequaquam autem *pondere*,) partem absolvat: Videtur inde nobis omnium verosimillimum, quod sub hoc actu *præcipitationis*, tantum tenerrimæ illius substantiæ in *spiritu Nitri, phlogistæ, martialibus* atomis adhærescat, ut illæ hinc ad hanc solubilitatem per *alcali* mox absolvendam, idoneæ fiant. Dum ex adverso, si nimis impetuosa, aut plena fiat *præcipitatio*, inter impetum effervescendi, ob citatam copiosam coacervationem, & rudiorē complicationem, atomorum *martialium, subtilis* hic coalitus vel planè non succedat, vel in *nitrosam* regeneratam mixtionem, tota iterum unicè involvatur.

§. XXXVI. Cæterum, quod nobis ita de *symbolica* hac accretione *phlogistæ* substantiæ, è *nitri* acido, videtur, roborari etiam potest alio experimento; dum *calces* metallorum, quæ in integra sua substantia materiam *phlogiston* involvunt, hac ratione, cum *nitri* acido paratæ, revera etiam posthac, cum corporali *nitro*, aliter sese gerunt, ad *accensionem*, seu detonationem, quàm per aliud acidum factæ.

§. XXXVII. Hæc pro sententiâ nostrâ, brevibus, sufficient, relinquendo aliis liberum campum, quod est in proverbio, sensu suo abundandi. Progredimur potius ad *usum*; quem ab hac solutione expectare, jus fasque videtur. Quem primariò in eo collocamus, quod solutio hæc, iterum tamen utique secundum discretionem acidorum, admodum *teneros* præbeat crocos, quales vix à solutionibus per acida quælibet factis, & inprimis è *tota substantia* martis, expectare liceat. Unde quidem quibus operæ pretium videtur, exquisitè *teneros crocos* martis assequi, illis hanc methodum ad illos obtinendos, confidenter commendamus.

§. XXXIIX. De valde decantatis *Medicis* usibus mar-

tialium, cum assentiri non possimus, nisi assentari in animum induceremus, quod indoli nostræ adversatur, non placet prolixitatem texere. Illud ab experientia cognitum habemus, quod hujus etiam croci, è tali solutione parati, quantumcunque etiam *tenuissimi*, effectus, sit satis potenter, licet placidè & teneriter, *adstrictorius*; id quod testatum dedit in violento vomitu cruento, qui à quatuor ejus granis, præsentissimè conquievit.

§. XXXIX. Puto, & propositum ita à nobis esse, quod *titulo* promissimus, experimentum, & enucleatum; quantum satis esse possit. Unde non placet, de hac materia plura proferre, nisi quod incidenter, digito quasi designare lubeat, experimentum, certo modo cum nostro hoc collineans, ad generalem *causalem* habitum, tanquam scopum: asseverando solum, pro nondum peritis, & peritis in memoriam revocando, & contemplationi adhibendæ commendando, quod *mar s*, per *spiritum nitri* seu *aquam fortem*, facilè ita disponi possit, ut ab *aqua forti* tunc non amplius solvatur, sed *pulveris*, quem vulgo *crocum* vocant, instar, intactus posthac ab *aqua forti*, maneat atque jaceat. Et quod hæc alteratio, dico per ipsam *aquam fortem*, sine nulla alia accessione, possit peragi, tam *tarde*, & diuturniore successu, quam *cito* & velut intra pauca *momenta*: Cum tamen alias, ut notissimum; acidum hoc *nitrosum*, *martem* in tota sua substantia, & solvat & retineat. Sed extrà præsentem nostrum scopum est; huic & similibus rebus, nunc diutius immorari.

§. XL. Progredimur itaque potius ad *alterum*, quod titulus præ se fert, experimentum, ANATOMIAM SULPHURIS. Videri poterit austeris censoribus, quod *crambem* recoctam apponamus; cum hæc res à D. D. Præside, jam antè plures annos in scenam producta sit. Imo illis, qui cum *Porciis Catonibus*, plebejâ dicacitate (quod non temerè *Africani* fugillatori imputat *Livius*) allatrare solent aliorum acta, (non magna solum sed parva etiam,) evenire inde posset, ut
bilem

bilem etiam recoquerent suam, & *fastus* ergo tales res, tanquam *novas* inventiones (nempe magni ponderis, & in quibus magna gloriæ materia quæri possit) ruminando repeti, exprobrent: sed, utroque modo, aliter se res ipsa habet. Nempe, cum ipso illo priore tempore, summæ simplicitatis hoc experimentum, etiam peritissimorum sibi visorum dexteritati, ita crucem fixerit, ut antequam propria manu ipsis ostenderetur, & per experimenta aliquot symbolica, (tanquam manifesta, non tam *argumenta* solum, quam *documenta*,) verus harum rerum habitus in sensus ingereretur; talium autem artificum non ita parva sit fraternitas: tantò magis autem, quod satis scimus, ingens illorum numerus, ad quos experimentum hoc plane non pervenit, qui tamen talium non incurii esse vellent; liberum utique propterea nobis putamus, ut hujus rei commemorationem æquè, atque enucleationem, per hanc occasionem, non solum repetamus, sed etiam illustremus.

§. XLI. Imò, ut nobis in more nunquam positum est, veritatem dissimulare, edicimus libere, quod tanto magis ad hanc rem iterum agendam, animum inclinaverit, solers conamen circa eandem Regii Chymix Professoris *Parisiensis*, gente tamen Germani, *Homborgii*, qui in *Anatomia Sulphuris* adornandâ, ante aliquot annos operam collocavit. Quamlibet autem unum in primis tentamen, experimento quidem etiam jamdudum curiosis noto, ipsi satis in sensus, obtulerit, felicem cœpti sui, nempe *anatomix sulphuris* successum, tamen circa alterum non æquè felix erat suppositio, quasi nempe illud ipsum *Gummi*, quod tandem inde resultat, ita ut in hac consistentia, sit *alterum* quasi principium Mixti hujus. Unde quidem *Mr. Geoffroy* propius scopum tetigit, sed sanè decem propemodum annis, post nostratam & commemorationem, & deductionem: Imò adeò adhuc dubiam invenit fidem, ut *l'Histoire de l'Academie Françoise*, anni 1704. equidem de invento hoc honorificè loquatur, sed ve-

reatur

reatur adhuc, ut plenam mereatur fidem, unde memorat: *si la decouverte que Mr. Geoffroy a faite, se verifie dans la suite, elle sera - - importante.* Sicut etiam tam mensis *September*, quàm *Dissertatio de Metallurgiæ & Docimasixæ fundamentis*, de Ferro non imparia, aliquot ante *Mr. Geoffroy* annis, indicavit.

§. XLII. Cæterum non magnum operæ pretium esset, *Anatomix* titulum, circa nostrum negotium, tueri, si cum folis harum rerum gnatis, res nobis, aut scripto nostro, obtingeret. Poterit tamen iis, qui opus habent declaratione, sufficere, quod *Anatomia* quæ talis, magis ad *historiam*, seu notitiam, *particularem*, inquam, scientiam, quàm ad *universalem*; & plenam, secundum omnes causas, respiciat: hanc verò *causalem*, theoriam, aliis respectibus, & docendi generibus & quasi partibus, relinquat.

§. XLIII. Unde *Anatomia Sulphuris* nostra, nihil propriè aliud complecti necesse habet, quam evolutionem *veram*, *sinceram*, & *simplicem*, partium, è quibus *sulphur*, quod vulgo *commune* dicitur, *conflatum* sit. Ubi non necesse est, pro *anatomix* titulo vindicando aut implendo, de *viribus* & *usibus* sulphuris, exquisitum commentarium scribere; & vel *positive*, vel *negative*, illi immorari. Unde bono jure liberum nobis potius ducemus, vel planè nihil verborum de hac re facere; vel ad minimum non latius ejus meminisse quam ad qualemcunque ostensionem, aut elucidationem, nostri propositi rerum, conducere arbitremur.

§. XLIV. Et sanè ordiemur ab hoc apice, nempe monendo, quod, antequam manus *anatomix* sulphuris admoveamus, jam aliunde vulgo notum sit, quod *sulphur* compos fit concipiendi ardoris *flammei*. Porro, quod idem in sinu suo foveat *falsedinem acidam*; documento tam *fumi* ejus, dum inflammatum ardet; quàm obtinendi, diversâ *enchirisi*, vulgi ita dicti *olei sulphuris*, seu *spiritus acidi fixioris*.

§. XLV.

§. XLV. Offert autem certè horum phænomenon conspectus, veluti specimen jam aliquod *anatomiae* sulphuris; monstrando, quod sulphur constet è materia *inflammabili*, & substantia *salina acida*.

§. XLVI. Interim non fidunt ita simpliciter, huic tanquam crudiori, avtopsiæ, chymixæ sectatores; metuentes, ne hæc phænomena non detegant discretas res *materiales*; sed solum unius forte rei discrepantes tantum *modos*, *schemata*, *larvas*; aut, *plurium* fortè rerum, nimis paucas tales, superficialiaras fortasse, *transfigurationes*. Ita enim aliqui, quod *unius* saltem rei, diversas has reputent esse veluti *larvas*, satis declarant, imò profitentur, illo asserto, quod *Ignis* ipse sit *acidum*. Alii vero mordicus inhiærent asserto illi suo, quod tanquam generalis axiomatis dignitate haberi volunt, quod *ignis mutet res*. *Interdum populus rectum videt, est ubi peccat*.

§. XLVII. Lentè festinandum est, ne incaute procedatur. Certè *volatile* illud acidum, ejus est geneleos, ut nemini homini vitio vertamus, si hæc, nudo primo intuitu, velut obnubilet oculos, aut subterfugiat aciem illorum, ne pares sint acutiori contemplationi. *Fixius* autem illud *acidum*, cum jam patientius ferat aspectum, imò longius examen, tam citò inter *larvas* connumerari, non meretur.

§. XLVIII. Potest huic rei testimonium perhibere, proventus *Vitrioli*, è mineris *sulphure* foetis; *cupreis* æque, atque *ferreis*: talibus imprimis, qualis eximiè est, vulgo dicta *Minera Martis solaris* Hassiaca. Quin etiam, è *sulphure*, *metallis* talibus dextrè sociato, & *inflammabili* ejus tenerrima portione, qua decet *modestia*, expulsa. Unde *acidum* ejusdem, metallo firmitus adhærens, per solam aquæ affusionem, cum particula arrepta metalli, in hanc insinuatur. Unde quidem satis abusiva est, vulgaris illa distinctio trivialis scholæ chymicæ, *Vitrioli vulgaris*, & *artificialis*. Cum in rei veritate, potius omne, quod vulgo ve-

num prostat, *vitriolum*, sit ita *artificiale*, seu arte factum. Utpote quod è *sulphuratis* mineris, *ustulatis*, aus dem gerösteten / noch nicht gar abgebrandten / Kupfferstein / aquâ elutriatur; Aliquibus autem in locis, deinde, *ferri* bracteis incotis saturatur.

§. XLIX. Dum *strictiore* usu ita dictum *artificiale*, parvo communiter pondere, è *cupro* aut *ferro*, & *acido* illo, sive *sulphuris* immediatè, quod vocant *per campanam*, sive è *vitriolo*, propulso, per modum simplicis solutionis & crystallisationis, paratur.

§. L. Ita nempe etiam *acidi* hujus sulphurei, & manifestus, & satis largus, proventus, sistit sese in vulgo ita dicto *Clyffo* sulphurato; sive è *sulphure* & *nitro* simpliciter: sive, ut coquinæ chymicæ usitatum est, addito etiam *antimonio*, ut ita *clyffus antimonii sulphuratus*, verbosiori titulo, nominari possit. Unde nempe *colluvies* acido spirituosâ emergit, *triplicis* indolis; *volatilis*, à flammea subtili extenuatione portionis alicujus sulphurei hujus acidi: *fixior*, *oleo* sulphuris *per campanam* gemina, nisi quod dilutior hæc sit, propter expressè appositum phlegmâ, in quod immergi possit; Et tandem *nitrose* præcipiæ, dum in hac tumultuaria incensione, portionis sulphuræ inflammabilis, liberatum acidum ejus *fixius*, ex aliqua parte occurrentes miculas *nitrosas*, *alcalica* sui portione privat, à quibus ita liberatus spiritus *acidus* nitrosus, in propria sua texturâ prodit. Unde etiam est, quod, si *clyffus* talis, inprimis è *nitro* & *sulphure*, sine antimonio, paratus, limaturæ *ferri*, aut *cupro*, affundatur, statim *nitrosum* illum nidorem olfactui objiciat: Et, si paulo largior adhibita fuerit quantitas, etiam fumo illo *fulvo* affectim evaporante, oculis sese offerat.

§. LI. Tantò magis autem illustrat universam rem, residuum operationis; inprimis, inquam, è *nitro* & *sulphure*, solis assumtis. Hoc enim nihil aliud deinde sistit, quam *sal medium*, quod à *Glasero* polychrestum appellatur: Quod
nempe

nempe solutum in aqua, & iterum *crystallisatum*, non aliam *figuram*, non alium *saporem*, non aliud *pondus*, verbo nullam aliam docimasiam, exhibet, quam geminum, quod è *fixo alcali & acido* sulphuris per campanam, aut spiritu *Vitrioli*, prodit. Natum videlicet, ut modo indicatum, è bona portione simplicioris *acidi*, quod sulphuri inest; & *alcali*, quod cum acido suo, *nitrum* corporale format. Unde etiam *medium* hoc sal, ita sincerum restat, quando, juxta *Gla-serum*, operatio tota in aperto crucibulo peragitur, & aciditas illa *triplex*, ita liberè in auras abire permittitur.

§. LII. Et hæcenus quidem tam producta illa in vulgus nota; quam *rationes* eorundem, non usque quaque æquali solertia pensitatæ. Ubi interim extra nostram considerationem relinquimus, illorum nimiam subtilitatem, qui rebus ipsis nomina sua relinquere aspernantes, nominibus potius res addicere gestiunt. Dum v. g. nec in *sulphure* esse *acidum*, nec in *antimonio* esse *sulphur*, consentiunt; sed unicè, tam in sulphur induci *schema* aciditatis, quam in *antimonium*, (& ab hoc argumento perperam *antimonio* attribui verum & reale *sulphur*, philosophantur,) cum in neutro horum aciditas illa inveniri possit, nisi *ignis* adhibeatur: qui demum *schema* hoc aciditatis his concretis inducat. Quamvis reverà, si tempus hujusmodi commentis perdere æquum quis duceret, puto facillime everteret assertionem talium, quod in *antimonio* non sit verum actuale *sulphur*, quia non, nisi per *ignem*, sulphureum quid tale (*ardor* sulphureus, & *acidum* sulphureum,) ex eo emicet. Dum potius, si vel maximè de sulphure verum dicerent, quod *ardor* ejus, & *aciditas*, ab *igne* demum formetur atque producat: plane contrario ordine tenerentur, de *antimonio* etiam asserere, quod in illo utique sit *sulphur*; quia etiam in illo, per *ignem* eundem, idem *ardor*, & eadem *aciditas*, producat. Juxta canonem certè mathematicæ veritatis: *æqualibus si addantur æqualia, quæ inde fiunt sunt æqualia*. Unde æqua-

lis *effectus* simpliciter, à simpliciter æquali *causa*, non potest supponi, nisi *subjectum* simpliciter sit æquale: iuxta simplici conversione Canonis.

§. LIII. Sed poterunt hi quoque opinionis suæ amussim experiri, applicando illam, aut exigendo, ad commensurationem experimenti, ut valdè simplicis, ita hac ipsa sua simplicitate, supervacuas subtilitates tantò efficacius coërcentis. Si *Sulphur* jungatur cum *sale alcali*, & miscela hæc forti igne tractetur, fluit tenuiter, & intimiore subagitatione æquabili, format massam, quæ effusa, refrigerescens, coagulati sanguinis colorem refert. Quod inprimis fit, si ad alcali partes duas, tertia pars addatur de sulphure. Quanto plus enim sulphuris admiscetur, usque ad pondus propemodum æquale utriusque, adhæret quidem sulphur alcalico sali, ut in igne etiam fortissimo, ab illo non fugiat (modo liberrimi aëris commercium excludatur, ut flammare non possit) interim effusum, & refrigeratum, *flavum* potius paulo obscuriorem & subfuscum, quam exquisitè rubrum, colorem exprimit.

§. LIV. Hic nempe *ignis* ille, qui *sulphur* in *acidum* convertere putatur, frustra profecto est, & neque sulphur hoc ita transfigurat; nec ipse decantatam illam efficaciam propriam suam, ut *acidi*, exferit in *alcali*, quod neque hic, nec immediatè, solum, sibi ita cominissum, (quod tamen *acida* etiam debilissima faciunt,) retundit, aut saturat.

§. LV. Si vero massa hæc, *sulphur*, inquam, per minima cum *alcalico* sale ita connexum, in pulverem reducatur, & in patulo atque pando vase, lenissimo igni imponatur, ad *levissimam* candefactionem, sub libero nempe aeris allabentis commercio: fit ita de momento in momentum, non, ut *sulphur* absumatur, comburatur, in auras exhalet &c. sed solum tenuissima illa ejus *portio*, verè primo & immediatè *inflammabilitati* exposita & obnoxia: Quo ita fiente, destituta ab hujus confortio altera illa ejus, verè *acida*,
pars

pars, cum *alkali* jam longè intimius, firmitus, atque constantius, connexa manet. Unde statim enascitur sal tale *medium*, quale è *positivâ* combinatione spiritus acidi, cum *alkali*, *sulphuris* per campanam, aut *vitrioli*, exsurgit.

§. LVI. Unde, cum antea sal *alkali*, tam per se, quam cum sulphure adhuc integro, dicto modo colliquatum, facilimè per deliquium, è nuda humiditate per aerem diffusa, humesceret, imò diffunderet; nunc, nempe sub hac societate cum hoc acido, etiam languidius in aqua dissolvitur, quam alia quæcunque salia, præter tartarum vini: Et insuper etiam largiorem mensuram pro solutione sui, postulat, cum ut *alkali* sincerum, quam minima quantitate contentum fuisset. Cum etiam, cum integro adhuc sulphure combinatum, *colorem* præ se ferret, sive *sanguineum* illum, sive alias valdè *saturatum* atque spissum, in solutione verò egregiè *flavum*: nunc, separata inflammabili illa subtilissima portione, omnem etiam *colorem* deposuit, & nihil aliud, nisi solutionem aquæ simplicis, & reductionem in Crystallum, sal plane clarè pelluciditatis, exhibet. Ubi etiam illa, ad oppositum usque, disparitas, subest, quod *alkali* fixum, à consistentiâ solidâ siccâ, & crystallis formandis, simpliciter alienum sit: in hac vero nova societate, totum primum ad illas & aptissimum. Par ratio est saporis; qui in *alkali* nudo, *urinosus* rudior, & planè *causticus* est; in societate cum *sulphure* adhuc *toto*, nauseosus atque foetidus: ablato verò subtili illo inflammabili, simpliciter *amarus*, nempe absolutè illi geminus, qui è miscela aliter separati è *sulphure* acidi, cum *alkali* provenit. Nihil autem fortassis attinet, prolixè insuper monere, quod hoc novum compositum sal, non solum pristinam suam *alcalicam* indolem, ergà acida, exuerit; Sed etiam in specie, quod illud acidum, quo nunc socio potitur, *alkali* hoc à quibuslibet aliis *acidis* liberum præstet atque intercludat: quod nempe *sulphureo* seu *vitriolico* proprium est.

§. LVII. Meretur autem revera luculentissimi testis

D ;

ho-

honorem, etiam illud experimentum, quod quidem nec alias ignotum, denuo vero notatum est, à supra dicto illo gallicanæ academix Symmysta. Quando nempe sulphur subtiliter pulverisatum, aut puri ejus flores, in sincero *oleo Terebinthinæ*, diu, & quantum potest, calore bono, (cui instituto inprimis altæ *phialæ* inserviunt) digeruntur; & nata inde flava solutio, blando calore, (in cucurbita etiam ampliore,) rectificatur, seu quantum ejus facile transtillat, abstrahitur: ipsum hoc iterum transtillans, tum etiam plus recentis, denuo cum reliquo sulphure ita tractatur: aut magna quantitas *olei* ita impenditur, ut tandem largior quantitas spissiusculæ, imò tandem spissæ, illius substantiæ, comparetur, quæ recedente copioso tenuiore oleo, tandem restitatur: (qui verba sonora amant, vocant *rubinum* sulphuris,) si tandem spissior hæc substantia, auctiore per gradus igne, destillatur, exhibet *oleosam* spissiore & *olidiorem* substantiam, & simul *aqueum* liquorem, non solum prorsus *acidum*, sed omnino *sulphurea* atque *vitriolica* aciditate. Ut adeò hac via similiter præsentia *aciditatis*, tanquam partis *constitutivæ* in mixtione sulphuris, non contemnendo documento ostendatur.

§. LVIII. Imò verò, si etiam, quantum fieri potest, exquisitiore observatione examinetur, quantum de assumpto pulvere sulphuris, tali operatione solutum fuerit; quantum *olei*, per abstractionem illam rectificatoriam, iterum liberum recedat: Et quantum tandem *oleosæ*, & adhuc *integrioris* sulphuræ, substantiæ, in destillatione crassamenti illius *rubicundi*, quasi resinosi, in *olei*, limpidi, & colorati, forma, adhuc transcendat: Et quantum denique *phlegmaticæ* humiditatis (balnei calore) *acidus* ille liquor adhuc dimittere possit: Poterit ex his comparationibus quadantenus colligi, quam multum *acidæ* substantiæ in sulphure insit: quam parum autem, pondere, *inflammabilis* illius.

§. LIX. Quemadmodum autem, & sane injuria, ars, valde

valdè usitate in speciosioribus, & simul operosioribus, sed & simul tanquam ordinarie intricatioribus, tentaminibus occupari, & documenta sua ex illis aucupari, gestit; ita evenit hoc etiam certissimè in hoc negotio, *anatomiae* talis principiorum sulphuris: dum longe *simpliciora*, & nihil usquam impedita, sed potius expeditissima æque, atque luculentissima, hujus rei documenta præsto sunt, in simplicissimo illo, à D. D. Præside, commendato experimenro. Potest tamen etiam hoc ipsum, ex hac eadem parte, nempe *acidæ* sulphuris substantiæ seorsim, jam allegato altero illo, propius declarato. Nempe: „Fundatur boni salis alcali quantum placet, „cum sulphure, ea proportionem, ut ad duas partes alcali, una „sulphuris, adhibeatur. Effusum hoc crama dividatur in „duas partes; una solvatur in aqua pluvîa: *nigrum* sedimentum, quod tamen exsiccatione albescit, filtratione separatur à claro: clarum præcipitetur aceto: quod iterum „filtratione collectum, una cum illo primum nigro pulvere, „sublimatione (etiam in parva proportionem docimastica,) in „sulphur reductum, ponderetur, ut nempe ita innotescat, „quantum sulphuris etiam in *altera* illa medietate adhuc in- „sit: & in hac etiam fuerit, cujus propterea pondus, subtrahendo, monstrabit pondus alcali, cum sulphure ibi sociati. „Jam tractetur altera illa medietas, supra laudata illa lenissimâ *candefactoria* calcinatione, donec albescat: quo facto, „repetito tunc hujus novi salini mixti examine per pondus, „dilucescet, primò, quantò plus ponderis hoc sal referat, ab „associatione *acidi* sulphuris, quam in altera medietate separati sulphuris pondus, subtractione sui monstraverat. „Secundò, quam exigua itaque quantitas, intuitu ponderis, „potuerit esse illius substantiæ, quæ lenissima incandescencia consumtibilis, *acidam* sulphuris portionem destituerat, „atque adeò societati salis alcali reliquerat. Quo, certè longe simplicioris operæ, experimento, non difficile erit colligere, non solum *præsentiam* acidi hujus in sulphure, ut
partis

Partis *constitutivæ* ejus; sed etiam ita insignem ejus *quantitatem*, ut longè maximam partem ponderis sulphuris ita absolvere, deprehendatur.

§. LX. Quamvis autem hoc experimento, sic satis simplici viâ, dilucescere videatur, quod sulphur non *potentiali*, sed *actuali* acido instructum sit, & maximam partem ex illo constet: tum etiam, quod *altera* pars *constitutiva* sulphuris, sit substantia *inflammabilis*, levi incandescencia inconcurrentem liberum aërem dilabens: Ne tamen speculabunda illa opinio, quasi tales alterationes simpliciter ab actione *ignis*, varie mutatoria, producantur, & nihil horum, quod ajunt, *formaliter*, in sulphuris mixto præexstiterit: Pro dirimenda omni lite, inserviet utique clarius documentum, experimento sistendum, quod in sulphure etiam *actualis* materia talis inflammabilis, verè reperiatur.

§. LXI. Dixeris, *hic Rhodus, hic saltus*. Sed non opus est *saltu*; cum etiam plano gressu hanc metam attingere liceat. Illud quidem minimè negandum est, sed potius dicendum, imò imperitos docendum, quin peritis alioquin, pro solertissima consideratione commendandum, quod materia hæc *subtilis*, primum & proximum *ignei* ardoris subiectum, seu *ignis materialis*, non solum ab *acido*, in mixtione sulphuris, vix ulla vulgari arte ita *seorsim* sequestrari atque fitti possit: Sed etiam simul alterum novum *paradoxum* ob oculos ponat, dum acidum illud præpotens, quod præ omnibus aliis; cum sale *alkali* intime & firmissime coire solet, ita retundat, occupet, implicet, præpediat, ut, quamdiu in hac societate detinetur, nullum habeat cum *alkali* congressum aut nexum.

§. LXII. Imò, ulteriore, & majore paradoxo, cum hoc *inflammabile*, etiam ex suo latere sali *alkali* promptè adhærescat; quod in conjunctione sulphuris cum *alkali*, sive in humida sive sicca, combinatione, nexus *alkali* cum sulphure, proprie ex latere hujus *inflammabilis* substantiæ, & minime

nimè ex latere *acidi* sulphuris, contingat. Quod manifestò patet ex eo, quod hæc connexio *sulphuris* cum *alkali*, etiam per *levissima* quælibet *acida* dissolvatur. Quod nempe minimè fieret, si nexus sulphuris cum *alkali*, per latus *acidi* hujus eveniret: Dum hoc acidum, potentius atque firmitus, quam ullum aliud, *alkalico* sali cohærescit, adeoque à nullo alio, nedum valde debili, ab hoc detrudi valeret.

§. LXIII. Interim, quam impeditum etiam sit, existentiam hujus *inflammabilis* substantiæ per methodum *analyticam* demonstrare, non deest tamen omnis etiam hoc præstandi potestas. Expedit autem difficultatem omnem planissimè, methodus à D.D. Præsidente ostensa, *Synthetica*, *analytica* interim bonæ spei, gliscit in allegato illo experimento resolutionis sulphuris per *oleum terebinthinæ*. Ubi à destillatione resinæ illius, quæ *acidum* illum liquorem præbet; etiam levis quædam *carbonaria* materia, capitis mortui instar, in vase remanet; quæ certè maximam partem *inflammabilem* illam sulphuris portionem, ad *acida* separatam, comprehendit.

§. LXIV. *Syntheticam* autem methodum quod attinet, valet de illa certissimè, Canon ille antiquæ veritatis: *Ex quibus aliquid fit, & in quæ resolvitur, ex illis constat*. Jam, si ex *acido* sulphureo, & *inflammabili* materia, per *synthesin*, sulphur verum producat; & *analysis*, tam simpliciter, ignitionis actu, & liberi aëris concursu, (quæ *inflammabilitatem*, & resolutionem in ignem, simpliciter stipant & perficiunt) *inflammabile* hoc ab *acido* illo iterum separetur: impletus est Canon, & asserta ejus conclusio. Experimentum itaque prodit ipsum.

§. LXV. Jungatur, antè dicto modo, sulphur *alkali* fixo; separetur ex illo *inflammabilis* ejus pars, per lenem incandescentiam, quoad sal compositum *album* remaneat, ut supra memoratum. Sali huic addatur denuo tenerum *inflammabile*, *fuligo volatilis*, *Rühnruf* (in occluso vase candefa-

defaciendo, ab adhærescente *oleoso-picea* portione depurata) imò simplices *carbones* leviorum lignorum, & instituat^r fusio. Confestim regenerabitur *sulphur*; ex hac *inflammabili* substantia, cum *acido*, sali *alkali* huc usque conexo. Unde hæc miscela denuo sistit ita dictum *hepar sulphuris*; in quo sal *alkali*, ab *acido* iterum liberum, *acre*, spontè *deliquescens*, quælibet debilia *acida* appetens, & per hæc *sulphuris* hujus commercium promptissimè derelinquens: quod *sulphur*, integrum iterum, & plena sui mixture perfectum, inde cadet, *lactis sulphuris* nomine.

§. LXVI. Ita nempe absoluta erit *Anatomia* directa *sulphuris*; & luci expositum, quasnam partes *constitutivas* habeat, in quas *resolvi*, & iterum ex illis *componi*, possit.

§. LXVII. Minimè quidem unquam dissimulavit, sed indicavit potius, disertè, & planè liberaliter, D. D. Præses, quod experimentum hoc, compare in fundo methodo, jam pridem produxerit *Glauberus*. Sed est etiam in apri-
co, quod nec ipse *Glauberus* illud intellexerit; in sola admiratione subsistens, & inde salis *mirabilis* nomen procu-
dens; nec artifices *dogmatici* sequentis ad hunc diem temporis, simplicitatem hanc veritatis inde hariolati sint. Tanto minus autem, in hanc usque horam, quantum ad nostram notitiam pervenerit, quisquam horum *differentiam* circa hæc negotia, *Glauberici* salis *mirabilis*, ab *alkali vitriolato*, & si quid est in alterutro prærogative, sive experientia sive ratione, perscrutatus est.

§. LXVIII. Ita etiam *Boyleanum* illud experimentum, per *oleum terebinth*, cum *oleo vitrioli*, verum *sulphur* producendi, lucem satis claram artificibus accendit: eò usque, ut etiam præcipui nominis chymicorum aliquis, ne quidem *succesum* ipsum hujus experimenti calculo suo approbaret: (nempe magis sine dubio literam processus, quam *rationem* enchiridium, nedum indolis rei totius secutus,) quod interim rectè procedit si bonum *oleum vitrioli* adhibea-

hibeatur, olei *terebinthinæ*, quantum superfluum est, moderatiore calore prius seorsim separetur, & tunc demum reliqua destillatio absolvatur: quorsum etiam pertinet, ut mox ab initio olei *terebinth.* bona quantitas adhibita sit &c. Cæterum quam operosa, & insuper sumtuosa, sit hæc methodus, res ipsa abundè loquitur: cum è contra, altera illa, ita in plano posita sit, ut nihil simplicius, purius, luculentius, desiderari possit.

§. LXIX. Ita etiam si oleum *vitrioli*, misceatur cum succis & lacrymis, *gummato-resinosi*, *aloe*, *scammonio*, *gummi guttæ*, *opio*, *galbano*, *myrrha* &c. & ab his, post modestam digestionem, dextrè abstrahatur, in qualibet harum operationum, quantum satis erit, *genesis* sulphuris sese manifestabit. Sed stipant hæc experimenta, partim difficultates, partim implicationes, variæ, quæ minùs circumspectos confundunt.

§. LXX. Ita etiam, si *ferrum* aut *chalybs*, in bono spiritu *vitrioli* dephlegmato, aut *oleo vitrioli*, solvatur, sub solutione coalescit aliquid *nigri*, grumulorum seu floccorum facie. Hoc, si seorsim collectum, & ab omni falsedine elotum, examinetur, *sulphur* est. Et præcedit tale quid, dextra operatione, etiam cum *Regulo antimonii*.

§. LXXI. Omnes autem & singulæ operosiores hæ, sumtuosiores, & maximam partem, per varietatem circumstantiarum, *dubiis* propiores, præparationes, accipiunt claram lucem, ab experimento à nobis producto, ut à quo omnes *heterogeneitates* absunt, & demonstrationem liquidò claram atque evidentem relinquunt.

§. LXXII. Ita quidem speramus, abundè satis factum esse proposito nostro; nempe, directæ *Anatomie* Sulphuris; qua scrutinium partium illud *constituentium* absolvatur: Non hujus autem, sed proprii loci esset, secundum hanc *Anatomiam*, de vero sulphuris *usu*, & genuinis *effectibus*, ex hoc fundamento, disquirere. Ante omnia quidem, nihil adeo

abstrusum, esse in sulphure, colligi inde posset; nec nimis avida spē exspectari ab illo debere. Interim, qui veram harmoniam salis *acidi* sulphurei æquē, atque principii *Phlogistæ*, eum rebus *subterraneis*, melius cognitam habent, non difficulter cognoscent, quam ob rem *sulphur*, cum *metallis*, tam omnibus, quam singulis (diversimode) tantum commercii habeat: Et penetratione sua, sua inquam *subtilitate*, etiam illa varie penetret, & subtiliter subeat, imò subtiliationi etiam illorum subserviat. Qua tamen de re, & inprimis *intimior* *Phlogistæ* principii, insinuatione in *metalla*, (qua de re in Dissert. de *fundamentis metallurgicæ & doçimasticæ* actum est) hic non est plura dicendi tempus.

§. LXXIII. Ex abundanti, placet minus peritis, & *κατὰ πόδα* curiosis, in aurem dicere, quod varii circumvolantes processus, & in *Concordantia* quoque *Beccheriana*, tanquam in Caveâ ex parte conclusi, qui de *sulphure* loquuntur, scripti videantur, vel antequam citrinum nostrum vulgare, tantâ copiâ, ex superiore, & inferiore *Saxoniâ*, in commercium veniret; vel alibi, ubi *aliud* sulphur præsto esset. Loquuntur autem communiter de *nativo* sulphure, quile etiam hodieque, ex parte, *passim* ad manus est. Unde v. g. ridiculi forent, qui sulphur *vulgatissimum citrinum*, *sublimatione* per Coleothar vitrioli, Crocum martis, linaturam martis, ad *rubedinem*, & inprimis *transparentem*, *rubini* aut *fulgidi topasii* facie, reducere, sperarent: quod interim cum illo, quod processus illi intelligunt, & aliqui etiam nominant, *Berg-Schweffel* parvo negotio succedit. Et simul, si quidquam spei, quam processus tales, magno subinde hiatu, promittunt, *analogum*, animo concipitur, certè in illo, quod intellectum volunt, quærendum id potius est, quam in *vulgato*.

§. LXXIV. Ut autem brevissimè, aliquid attingamus, quod simplicius ex hac solidâ *sulphuris anatomia* fluit, puto perspecturos hinc esse prudentiores, quid sperandum sit
de

de coepto illo, quod inter trivialis Chymicorum agitatur, e *sulphure communi*, *oleum* eliciendi: nempe sine trôpo, *pingue*, aquosis *supernatans*, *immediatè inflammabile*. Non est in *sulphure* talis *pinguedo*; siquidem talis, jam est res *composita*: nempe principium illud *phlogiston*, multæ *aquositati*, *ardè* & intimiùs combinatum: unde, nisi prius didicerint, quod sanè ingens operæ pretium faceret, *carbones*, *fuliginem* (puram, à superficialiter adhærente actuali adhuc pinguedine liberatam,) in tale verum *oleum* & pinguedinem reducere, semper frustra erunt, ad simile quiddam è *sulphure* eliciendum. Est utique ipsum sulphur, *pinguedo* talis; dum principium hoc *phlogiston*, cum *aquositate*, quæ *salis* illius acidum, quatenus *salis*, portionem constituit, hac ratione, (per hoc acidum, ut *Sal acidum*,) in hanc consistentiam deducitur, quæ crassissimam *pinguedinem* repræsentat: utique *ardentem*, cum *aqueis* simplicibus non coeuntem, sed *supernatantem*, facile *liquefcentem*, propè uti *pix* aut *cera*. Unde certè, si *oleum* è *sulphure* facere didicerint, inveiunt, non per modum *separationis*, sed *productionis*, hoc processisse, & eadem arte, totum *sulphur* in *oleum* conversum iri.

§ LXXV. Nempè jaundudum utique animo Dn. D. Præsidis, obversatur hoc problema, *phlogiston* hoc principium, (ab *aquositate* depulsum,) per artem in hanc mixtionem *reducere*. Utique postquam jam antè triginta & amplius annos, satis exquisitè intellectum habebat experimentum illud, ut experimentum, (quod magno numero artificiosissimorum speculatorum, solum ut experimentum, toties, quoties per jocum proponebat, cerebellum torfit, & pro magno paradoxo fuit;) nempè, *limpidissimum* quodlibet, & ut vulgo loquuntur *homogeneum*, imò *æthereum*, *volatissimum*, *pingue*, seu *oleum destillatum*, *camphoram* &c. *sine ullo addito*, in ictu oculi, è mixtione sua deturbandi; & loco *liquiditatis* in incorrigibilem *siccitatem*, loco *pel-*

luciditatis in extremam obscuritatem, loco volatilitatis à calore, in fixitatem, (si aeris commercium perfectè excludatur,) ad centum annos, imò quamdiu stabit mundus, ab igne non disjiciendam, reducendi: nempe, nudâ accensione & deflagratione, in fuliginem. Quam, ut & carbonariam inflammabilem substantiam, si quis iterum, pristino modo aquositati conciliare, & ita firmiter innectere, didicerit, artificium certè invenerit, omnibus seculis inauditum, sed profectò immane operæ pretium facturum. Quod interim ut hætenus in solius naturæ vegetantis potestate, & certe lentis progressibus, substitit: ita probabile omninò est, non simpliciter impossibilem fore ejus imitationem etiam Arti: sed profecto non illi coëtoricæ & confusoriæ, qualis est magnifica illa vulgò decantata Chymia.

§. LXXVI. Propius autem sine dubio collineant ad scopum, qui jam ab *aquositate* separatum, & *terrestris* jam propius indolis, in terrestres miscelas introducere sperant, & ita omnibus votis exoptatum, illud *sulphur fixum*, imperrare. Ridicule verò certè hoc à *tota substantia* sulphuris communis expectaverint, aut de ea speraverint: Utpote à cujus *aciditate*, necessario prius separandum esset ejus principium *aquosum*. Quod si præstitum fuerit, vix dubitare liceret, quin *arctior* concretio, & *fixus nexus* remansurus esset, principii hujus *Phlogistæ*, cum principio illo *terreo, metallicæ* mixtioni certissime *analogo*, quod quamdiu cum *aqua* intimius adhuc connexum hæret, *salinam* illam *acidam* consistentiam sistit. Sed fortè difficilior est, quam vulgo creditur, altum hic sapere: qui potest capere, capiat.

§. LXXVII. Illud autem necessariò antè oculos habendum hic sine dubio erit, quod, quantò magis *phlogiston* hoc, sive in *sulphure*, sive albi, ad *pinguedinis* statum reducatur, eo magis firmæ atque *fixæ* immixtioni in concreta *terrea, metallica*, ineptum evasurum sit, & contra. Quantum interim etiam in hac sua consistentia, inclinet atque tendat, ad

coalitum cum *metallis*, eumque etiam satis *arctum*, sed non intimum atque stabilem, ad oculum dilucescit in *reductionibus* Metallorum; *stanni*, etiam per simplicem pinguedinem, sive *vegetabilis*, illa sit, sive *animalis*: *plumbi*, *cupri*, *ferri*, per *ficciorem* jam, è *carbonibus*, (tam *animalibus*, quam *vegetabilibus*,) & *fuliginibus*. Interim scintillam quandam veritatis, etiam hoc in genere præbent, sed perite profecto instituendæ, *reductiones* hujusmodi, concurrentibus idoneis ad talem *intimiorum* complexum jam proxime dispositis subiectis. Qua de re pluribus verbis actum est, in *Speciminis Beccheriani* part II. Et umbram ejus rei, non tamen plane evanidam, profert, experimentum illud, quando bonum *argentum* purum, sæpius repetita *cementatione cum tritico*, tandem examinatum, aliquid *auri* exhibet, eine Spuhr von Gold.

§. LXXVIII. Sed absit, ut ab *Anatomia*, præsertim ita *simplicissima*, & nulla difficili *exenteratione* indigente, ad *extispicia*, & *aruspicinam*, pedem promoveamus: Cum certa semper steterit atque stet sententia, & sincerum pro idoneis ingeniis consilium, *Scientiæ*, tantum, nequaquam autem *Concupiscentiæ*, litare, nedum in ambitu quærere, quod proxime Centrum quæreudum sit, & juxta Proverbium foris, quod domi sit. Deum potius T. O. M., qui sapientiæ suæ, etiam communiter in summa simplicitate maximè mirabilis, venerandum intuitum modestis spectatoribus non denegat, submissis precibus veneramur, ut considerationes nostræ, in gloriam ejus, & nostram *αὐταρχεῖαν*, semper ab Ipso dirigantur.

S. D. G.

DN. CANDIDATO

P R Æ S E S.

S. D.



Dilecti jam propemodum vim potius, quam axiomatis ferri, obtinuit, Medicinam niti ratione & experientia. Sicut enim quæ quotidiano sermone agitantur, dum in consuetudinem solius auditus abeunt, minus vulgo ad animum revocantur: Ita certè qui hoc idem de Medicina quoque, secundum hunc canonem consideranda, dixerit, minimè errabit. Quem enim attentiores observatores fallere potest, quod nec experientia simplicissima, obvia & perpetua, circa vitam, sanitatem, atque morbos, satis diligenter animadvertatur: neque ratio harum rerum, qua conveniebat solertia, ad animum revocetur. Quid mirum itaque, si Ars, licet amœnæ curiositatis plena, sed tamen non tantundem uti Medicinæ, necessaria, nihilo felicior hac in parte existat: sed similiter, cum ipsa quoque, ut ars, ratione & experientia excoli deberet, pari utriusque neglectu tractetur. Verbis quidem altisonis, ad fastum usque, & justum fastidium, tam Medicinam, quam Chymicam artem, celebri, nemo nescit; sed multi profecto nesciunt, quam steriles atque cassæ utræque, inter tantas commendationes, atque commentationes, ad hunc usque diem persistant. Non pudet repetere, (dum nunquam nimis dicitur, quod nunquam satis discitur,) sed piget propemodum, verissimum illud monitum Isocratis, contra sui temporis Sophistas: Non magnas reddunt artes, qui jactabundè de illis loqui gestiunt, sed illi potius, qui quantum in unaquaque verè inest, reperire atque in effectum deducere valent. Non dubito dicere, quod paria fata cum Medicina, chy.

chymia non aliunde subierit, nisi quod juxta cum illa, in eosdem homines incidit. Quid enim manifestum magis est, quam quod vanæ illæ jactationes, de chymia non aliunde prodierint, nisi è pharmaceuticis squaloribus, de quibus nihil verius dici potest, quam quod Beccherus eloquitur, quod frequentissimè nucleus in ita dictis fæcibus, abjiciatur & cortices in splendore asserventur. Unde revera plus longe experimentorum, solerte disquisitione dignorum, inter manuarios operadores reperitur, quos vulgo laborantes vocant, quam apud Rhetores, in variis Systematibus, atque Commentariis verbosissimis. Non ignoro certè, nec dissimulo quidem, quod Chymia, in toto suo ambitu considerata, ad Medicam artem non pertineat. Interim cum, ut habet plebeum proverbium, crinibus veluti ad hanc trahatur, non potest etiam, quid veri usus illi insit, comprehendere, nisi ipsa quoque solertius, quam huc usque factum est, enucleetur. Minime itaque vitio sed laudi potius, duco, & Tibi Nobilissime Domine Canditate, verto quod hujus etiam artis studio, cum medicina, industriam adhibueris, neque, hoc intuitu, Inauguralis speciminis dignitas detrahi potest, Dissertationi tuæ, chymica duo experimenta proponenti. Tantò magis, cum insuper non, communi more, extritas jam pridem paleas atque stipulas, trituras susceperit; sed propemodum inaudita, & decantatæ chymix fidem excedentia, specimina, partim notet, partim enucleat ac demonstret. Omne tulit punctum, qui miscuit utile dulci. Jucundum certe est, veritatem ipsam, etiam per chymiam, pervestigare. Quod non inutile sit etiam alioquin, non plane ignoras. Quod verò etiam ad Medicinam utile, ad minimum illo intuitu intelligis, dum inanes spes & pollicitationes, quas in hoc genere jactat atque latet inanis Pharmacopoliorum apparatus, hujusmodi sincerior Chymix pervestigatio, optima fide demonstrat.

tulor itaque Tibi de his quoque studiis atque coeptis; tanto magis autem de ipsa tali methodo, quæ non solum chymia, sed ipsius etiam medicina, solidæ cognitioni, & felici usui, unice quadrat. Nempe rerum ipsarum, non solum simplici, sed etiam penitiori, scrutinio, per experimenta, atque collustratas rationes, insistent. Prudentiæ erit, ita ordinare harum rerum usum, ne uni præjudicium ab altera, impedimentum, needum detrimentum, oriatur. Nunquam hoc fiet, si semper jucunditas ad utilitatem expendatur; utilitas verò, magis in ipsa re diligenter atque dextrè examinata, quam spe immatura, & intempestive tumida, quærat. Præcipue verò etiam illud semper animo altius impressum maneat, quod medicina, præter superficiarios magis quosdam, purioris ab impuriore, efficacis ab ignavio-
re, secretorios effectus, nihil eximii usus fas sit polliceri. Puto me habere quod tibi gratuler, de longe firmiore in Medica arte fundamento, diligenter percepto; quod non, nec in chymia neque pharmacica reliqua, sed in Methodo, veræ Pathologiæ superstructa, vera lateant artis medicæ ar-
cana. Horum ut intellectum verum, memori mente atque animo recondas; atque usum dextrum & peritum, circum-
specto Clinicæ praxeos exercitio experiaris, & ad hos effe-
ctus, Divinæ gratiæ atque benedictionis præsidio potiaris, est quod sincero animo precor. Vale.

Dabam è Musæo, d. XXI. Mart. MD CCXII.

SI fuit horrendus, primus qui protulit enses
Si ferus & vere ferreus ille fuit.
Quod primum cædes homini, quod prælia nata,
Quod breuior diræ mortis aperta via est:

Deli-

Deliciæ gentis merito mortalis habetur

Chemicus & cunctis aureus audit homo:

Aureus est etenim labor hic, qui vertit in vsum

Morbida gens hominum, cuncta metalla tuum.

Gratulor hinc etiam, SPETHI, Tibi ferra docenti

Vertere in humanas, commoda quanta! vices.

Gratulor & votis faciam, (quæ vota valebunt)

Quo pede cœpisti, quo bene semper eas!

Experientissimo Dn. Candidato gratulabundus
deproperavit

HEINR. CHRISTOPH. Wesselmann/
Rauensbergius Westfalus, Philosophiæ
Candidatus.



THE
LIBRARY OF THE
MUSEUM OF NATURAL HISTORY
AND
ZOOLOGY
OF THE
CITY OF LONDON
IN THE
MUSEUM BUILDINGS
LONDON
W.C.1

